

REGIONAL NEWS

HEADLINES:

1. Dampa biala bye-election lo awm tura chief minister leh adviser to CM (health) te election model code of conduct bawhchhia a puhna chu naktuk hian Election Commission of India ah thawn thlak tum a ni.
2. Rawthing tam avanga sazu puangin chhungkaw 5,622 thlawhhma hectare 2,331 point 154 a zau a tihchhiatsak tawh.
3. Lai autonomous district council (LADC) inthlan neih hun tur puan thuai rin ani.
4. Andhra Pradesh-a nimina temple pakhata mipui innnek buaina thlengah mi 9 an thi a, midang engemawzatin hliam an tuar bawk.

<><><>

EMCC VIOLATION

Dampa biala bye-election lo awm tura vote an zawnna-ah chief minister Pu Lalduhoma leh adviser to CM (health) Dr. Lorrain Lalpeklana Chinzah te election model code of conduct (EMCC) bawhchhia a puhna chu naktuk hian Election Commission of India a thawn thlak hman rin a ni.

Chief Electoral Officer (CEO) pisa atanga thudawn danin chief minister leh adviser to CM te laka MNF-in EMCC bawhchhia a an puhna hi rorellai ZPM chuan a chhang tawh a. Mamit bawrhsap, district election officer (DEO) ni bawk leh Dampa bial bye-election a returning officer (RO) te'n an ngaihdan an thawh chu CEO lam hian an lo enfiah ve leh a. An hmuh dan hi election commission-ah an thawn thla ang a, commission hian thutlukna a siam dawn a ni. CM leh adviser to CM te EMCC bawhchhia a puhna hi MNF party aiawhin ukil Pi Zothansangi Hmar-in a thehlut a. Pu Lalduhoma chu October ni 21-a West Phaileng khua a ZPM candidate tana a campaign-na-ah Reiek khua leh a chhehvel khaw 14 chawm tur cheng vaibelchhe 770 ruahman a nih tur thu a puan chu inthlan dan bawhchhiatna a ni a ti a. Dr. Lorrain Lalpeklana'n October ni 17 khan Parvatui leh Phulpui West khua-ah a thlawna damlo inentirna hun huaihawtin damdawi pawh a thlawnin tam tham tak sem a ni a ti a. Hei pawh hi EMCC bawhchhiatna chiang tak a ni a ti.

Dampa bial khaw thenkhata a thlawna T-Shirt sema BJP puhna chu Mamit district DEO chuan EMCC bawhchhia a puhna thubuai a ziaklut bawk a. Hemi chungchang insawifiah tura BJP hruiute a tihna chhan a nih hnu-ah la ngaihtuah zawm tur a ni ang.

He tih lai hian Aam AadmiParty (AAP) Mizoram chuan PWD Minister Pu Vanlalhlana chu EMCC bawhchhia-ah an puh bawk a. Pu Vanlalhlana hian October ni 3 khan Phuldungsei khuaa a campaign-na-ah North East Special Infrastructure Development Scheme (NESIDS) hnuaiah Pukzing leh Silsury kawng, truck kal theihna a siam tura awm vek tawh chu ZPM candidate Pu Vanlalsailova a tling lo a nih chuan ngaituah nawn ngai leh tur anga a sawi ni a an sawi chu mipui vaubehna leh EMCC bawhchhiatna chiang tak a ni, an ti a ni.

<><><>

SARAS FAIR

Thingtlanga kuthnathawktu hmeichhiate tharchhuah zawrhna SARAS Fair vawi – 11-na SHG Mela SARAS FAIR leh SHG MELA 2025 chu nizan khan a tawp a, ni 4 chhungin cheng nuai 54, sing 3, sang 5 chuang man hralh chhuah a ni.

Akashvani News Aizawl zawhna chhangin, DAY-NULM Manager Gudhi Singh chuan Urban leh Rural an inthen hrang tih sawiin, Urban chuan District 11 huamin Thawhlelni atanga SARAS FAIR leh SHG MELA 2025 an neih chhung hian an in hralh tha hle a ti a, a hawn ni khan Urban area atanga thil zuarte chuan cheng nuai 3, sing 8, sang 5 man an hralh a, a tuk Nilainiah cheng nuai 5, sing 5 man hralh lehin, Ningani khan cheng nuai sing 7, sang 4 chuang man an hralh leh a, Zirtawpni kha an hralh tam ber ni niin cheng nuai 10, sing 1, sang 3 man an hralh tih sawiin, nimin pawh a khar ni a nih bakah chawlh a ni a, concert te a awm bawh avangin mipui an tam tih a sawi bawh.

MzSRLM CEO Pi Zosangzuali Pachuau chuan thingtlang khaw hrang hrang 71 atanga nu 98 in stall 52 an hawng tih sawiin an thil siamchhuah leh an thar chhuah te an zuar a, an rin phakbak a an inhralh that thu leh mi tam tak tan hlawkna a thlen dawn a ti a, Lungleiah pawh SARAS buatsaih leh tum mek ani tih sawiin mipuite chu hlut sak zel turin a sawm a ni.

<><><>

THINGTAM

Rawthing tam avanga sazu puangin chhungkaw 5,622 thlawhhma hectare 2,331 point 154 a zau a tihchhiatsak tawh.

Agriculture & Farmers' Welfare department hotute sawi danin rawthing tam avanga tuartu chhungkaw 5,622 te hi district 11 a khaw 170 aia tlem lova chengte an ni a. Sazu puangin thlawhhma a tihchhiat zau zawng hi lakkhawm mek a ni a, November ni 10 ah chuan Mizoram puma buh leh thlai tihchhiat zat,chiang leh felfai zawka puan theih an inbeisei thu an sawi ani. Thingtam sazu puangin thlawhhma a tihchhiat hi nasa takin a pung chho a. September thla tawpa Lunglei district ringawtah loneitu chhungkua 121 thlawhhma a tihchhiat lai-in tun hnaiah chuan chhungkaw 719 thlawhhma an seh tawh a ,Lunglei district bikah hian a tira khaw 11 chauh in an tawrh lai in tunah chuan khaw 19-in nasa takin an buaipui tawh a, kuthnathawktute thlawhhma a tihchhiat phei chu an pung nasa hle a, a huhova tur hmanga sazu hrai pawh an bei nasa hle a ni. Serchhip district-ah pawh Chawm, Chamdur, Thliarpui, Lumtui, Tuichar, Zuangleng, Zehtet,Thuhruk, Lungbu, Luitdam, Tuisen leh Lathei khaw thlawhhma-ahte Serchhip Joint VC leh Agriculture department hnathawkte'n a huhova sazu hrai runpui Zirtawpni khan an huaihawt bawh a.

Sazu tur hi Agriculture & Farmers' Welfare department chuan tam tham tak an sem chhuak tawh niin an sawi a. Rawthing tam avanga kuthnathawktute tawrhna leh hloh hi state specific disaster a puang turin Disaster Management & Rehabilitation-ah ngen mek a ni a. He lama thuneitu sang ber state disaster management authority SDMA) chu an chairman, chief minister hova thukhawm thuai tura an beisei thu dawn a ni. Puan a nih chuan rawthing tamin a hrin sazu puang avanga an buh leh bal leh thlai tam tak chantute hi zangnadawmna pek theih a beisei-awm thu Agriculture & Farmers' Welfare department hotute chuan an sawi a ni.

BIOMETRIC ENROLMENT

Myanmar atanga raltlan awm mekte kutze thla leh mit-naute lakkhawm mekah raltlan awmzat atanga chhutin za zelah 48 point 55 zawh a ni tawh.

Home department atanga Akashvani News Aizawl-in thu a dawn danin Zirtawpni thleng khan Myanmar raltlan 31,265 zinga 15,180-te biometric data lakkhawm a ni tawh a, hei hi Myanmar raltlan awm zawng zawng atanga chhutin za zelah 48 point 55 a ni a, July thla tawp atang khan he hna hi district 11-ah kalpui tan a ni a, khawl harsatna leh internet chak tawh loh avangin duh angin an thawk chak thei lova, chuti chung chuan tha thlah lova kalpui zel a ni.

He tih lai hian Myanmar sipaite chuan December thla chawhnu lama inthlanpui buatsaih tur tinzawnin Sagaing Division a Kalaymyo lam atangin Chin state a beihpui thlak an tum niin Tahan Post chuan a tarlang a. Chin state ah khawpui 3 - Thantlang, Falam leh Tonzang te laklet leh an tum dawn nia sawi ani a,hetiang sipai an chet leh chuan Mizoram lamah raltlan an luh belh leh a rinawm thu an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

LADC POLLS

Lai autonomous district council (LADC) inthlan neih hun tur puan thuai a nih a rinawm.

State election commissioner Dr. H. Lalthlangliana'n LADC inthlanlo awm tur atana inpuahchah dan dinhmun thlithlai turin naktuk hian Lawngtlai a tlawh dawn a. tuna LADC ding lai hun hi December ni 18 khian a tawp dawn a, chumi hma ngei chuan inthlan buatsaih a nih a rinawm ani. Pu H. Lalthlangliana hian naktuk vek hian inthlan buatsaih atana mi pawimawh, district official-te, police hotute, tlawmngai pawl leh kohhran hrutute nen inthlanna atana inpuahchahna chungchang an sawiho ang. A thlana thlan member of district council (MDC) 25 awmna LADC inthlan lo awm tur atan hian vote nei thei tur tih chianna (final electoral roll) pawh September ni 30 khan tihchhuah a ni tawh a. LADC inthlan lo awm turah hian vote nei mi 56,857 an awm mek a, an zinga 29,013 hi hmeichhia an ni a, mipa 27,844 an awm bawh a. Polling Station- a Vote awm tamna ber chu vote 1,189 awmna Pangkhua a ni a, Polling Station- a vote tlemna ber chu vote 1 chauh awmna Hmawngbuchhuah a ni.

<><><>